

Regum & Dictatorum potestas contineretur. Totiesque Imperatores sunt dicti quoties aliquid præclare per se aut duces in prelio gessissent. Cum vero in aversa hujus nummi parte arcus sit triumphalis cum equestri figura inter duo trophea cum titulo DE BRITAN. duplicem victoriam nono Claudii anno ex numero Tribunitie potestatis, reportatam fuisse judicamus.



In secundo numismate quod etiam Claudii Augusti, ex hac inscriptione, TI. CLAVD. CÆS. AVG. GER. TR. P. XII. IMP. XIIIX. docemur illum duodecimo imperii anno, re bene in Britannia gesta decimo-octavo Imperatorem fuisse acclamatum, & Coloniam Camalodunum eo tempore deductam, quod innuit expressus colonus cum vacca & tauro. Romani, inquit Servius, condituri civitates, taurum in dextra, vaccam intrinsecus jungebant cincti ritu Gabino, id est togæ parte caput velati, parte succincti, tenebant stivam incurvam, ut glebæ omnes intrinsecus caderent. Et ita sulco ducto, loca murorum designabant, aratrum suspendentes circa loca portarum.



Claudii filius cujus est tertius nummus caractere Græco ob res à patre feliciter gestas BRITANNICI cognomine quo quasi proprio uteretur Senatus-consulto ornatus erat. Cui precatus est Seneca, ut Germaniam pacet, Britanniam aperiat, & patris triumphos ducat, & novos. Quid verò velit dimidiata in illo navis cum inscriptione Metropolis Etiminii Regis? Sane mihi non liquet quis ille Etiminus, nisi lubeat suspicari illum ipsum fuisse Adiminium Regis Cunobilini filium, quem ad C. Caligulam transfugisse memorat Suetonius.



Qui ordine quartus est Hadriani nummus cum scriptura HADRIANVS AVG: CONSVLIII, PATER PATRIÆ. Et in altera parte EXERCITVS BRITANNICVS per tres milites representatus, judicamus denotare tres legiones anno Christi 120. (tunc ille III Consul) in Britannia egisse, scilicet Secundam Augustam, Sextam Victricem, & Vicesimam Victricem.



Quintus & sextus qui sunt Antonini pii, inscripti An-

toninus Augustus Pius, Pater patriæ, Tribunitia potestate, Consul tertium, & in aversis partibus alter Britanniam rupibus insidentem cum signo militari, hasta, & scuto, alter eandem globo insidentem habet; signati videntur in Antonini Pii honorem à Provincia Britannia cum ille imperium auspicaretur anno Christi 140. Ille militaris provincie Britannie habitus



denotat Britanniam tunc temporis militari gloria floruisse; ut quem Italia in ejus honorem eo tempore percussit, habet figuram insidentem globo cum Cornucopia, ad omnium rerum copiam; quem Sicilia, habet figuram cum spicis, ad fecunditatem; quem Mauritania, figuram hastilia tenentem cum equo, ad equestrem ejus provincie gloriam denotandam. Huc etiam referendus est nonus qui ejusdem est Antonini, sed non suo loco positus.



Septimus nummus qui Commodi, tantum docet illum ob victoriam contra Britanos BRITANNICI nomen sibi assumpsisse: in altera enim parte victoria cum palma scutum tenens, & devictorum Britannorum scutis insidens cum VICTORIA BRITANNICA cernitur.



Octavius qui est Caracalla & non suo loco hic ponitur, signatius ostendit ex numeris illum devicisse hostes in Britannia anno salutis 214. & ex tropheo, quod melius quam sculptor, depinxit his versibus Virgilius:

Ingentem quercum decisis undique ramis  
Constituit tumulo, fulgentiaque induit arma  
Mezentis ducis exuvias, tibi magne trophæum  
Bellipotens: aptat roranteis sanguine cristas,  
Telaque trunca viri.



Idem sentiendum est de duodecimo, qui est ejusdem Caracalla.